

四庫全書

子部

欽定四庫全書

子部

御定星厯考原卷四

詳校官欽天監天文生臣賈德輔

靈臺郎臣倪廷梅覆勘

總校官編修臣王燕緒

校對官主事臣郭長發

謄錄監生臣魏綿曾

欽定四庫全書

御定星歷考原卷四

月事凶神

月建

天寶歷曰月建者陽建之神也所理之方戰鬪攻伐宜背之不可抵向所直之日宜封建視事不宜興造土功結親禮○歷例曰正月建寅順行十二辰○曹震圭曰月建所理之地戰鬪攻伐不宜向而宜背者蓋

使我乘旺氣而攻彼休囚也所直之日宜封建視事者建者健也是月內羣神之長萬神無不咸服也不可興造土功者蓋彼當旺勢不可犯也其不可結親禮者是陽建獨旺陰建氣消之辰親禮之道宜陰陽相和若偏則不宜也

月破

月破者月建所衝之日也與歲破義同

天罡 河魁

桑道茂曰天罡河魁者月內凶神也所直之日百事宜
避○歷例曰陽建之月前三辰為天罡後三辰為河
魁陰建之月反是○曹震圭曰魁罡者乃月建四殺
之辰平收之日也○洞源經云對七為衝隔三為破
選擇家所謂辰破丑而丑衝未亥破寅而寅衝申午
破卯而卯衝酉酉破子而子衝午申破巳而已衝亥
戌破未而未衝丑是也

月殺

廣聖歷曰月殺者月內之殺神也其日忌停賓客興穿掘營種植納羣畜○歷例曰月殺者正月起丑逆行四季

按月殺與歲殺同義見第二卷

月刑

廣聖歷曰月建所刑之辰其日忌出軍攻戰養育生財結婚姻營造屋舍○歷例曰月刑者正月巳二月子三月辰四月申五月午六月丑七月寅八月酉九月

未十月亥十一月卯十二月戌○選擇家書曰寅刑
巳巳刑申申刑寅為無恩之刑未刑丑丑刑戌戌刑
未為恃勢之刑子刑卯卯刑子為無禮之刑辰午酉
亥為自刑○曹震圭曰月刑者月建之三刑也是前
後三辰相尅制也因名曰三刑假如無恩刑者謂巳
火也賴寅木而生反以長生之庚金制寅木也申金
也賴巳火而生反以長生之壬水制巳火也寅木也
賴申中長生之水土而生反以所生火尅申金也以

子反害其母為無恩故曰刑也或曰寅以生火刑巳
中生金巳以寄土刑申中生水申以生水刑寅中生
火也恃勢刑者丑以墓金尅未中墓木未以陰墓之
水尅戌中墓火戌以墓火尅丑中墓金又云丑恃癸
水刑戌之墓火戌恃辛金刑未之墓木未恃丁火刑丑
之墓金也無禮刑者謂卯中之乙賴子為貴子中之
癸賴卯為貴然卯以長生之巳土刑子中之癸水子
以長生之辛金刑卯中之乙木傷其貴德失其尊卑

故曰無禮也自刑者辰之墓土自制其墓水午中生乙自制其己土酉中生丁自制其辛金亥中生木自制其己土故曰自刑也

按月刑與歲刑同而理解各異兩存其說以備互考又褚華谷曰子卯一刑也寅巳申二刑也丑戌未三刑也自卯順至子子逆至卯極十數而為無禮之刑寅逆至巳巳逆至申極十數而為無恩之刑丑順至戌戌順至未極十數而為恃勢之刑故皇數中天以

十為殺數積數至十則悉空其數天道惡盈滿則覆也此三刑之法所由起也此亦可備一說

月害

神樞經曰月害者陽建所害之辰也所直之日忌攻城野戰牧養羣畜結會親姻請醫巫納奴婢○歷例曰正月起已逆行十二辰○曹震圭曰月害者月中六害也假令卯辰相害者卯以乙旺之木害辰墓之土辰以墓土却害卯中癸水也寅巳相害者謂寅以旺

甲害巳中戌土而已以生庚害寅中旺甲也丑午相
害者丑以癸水害午中丁火午以己土害丑中癸水
也子未相害者子以所生之辛金害未中墓木未以
旺土害子中旺水也申亥相害者亥以生木害申中
生土申以旺金害亥中生木又以生土害亥中旺水
也酉戌相害者戌以墓火害酉之旺金酉以所生丁
火害戌中辛金也

按六害者不和也凡事莫不喜合而忌衝正月建寅

與亥合而已衝之故寅與巳害二月建卯與戌合而辰衝之故卯與辰害蓋月建者衆神之首衝其所合是以害也

獨火

按獨火與月害同亦名遊禍又名六害

月虛

樞要歷曰月虛者月內虛神也其日忌開倉庫出財物運動征行成親禮○歷例曰月虛者正月起丑逆行

四季○曹震圭曰月虛者月建三合五行成形之位
物初成形其體未實故名曰虛與月殺同位

大耗

樞要歷曰大耗者月中虛耗之神也其日忌營庫藏出
財物遠經求取債負○歷例曰大耗者正月起申順
行十二辰○曹震圭曰大耗者月建擊衝破散之辰
也與月破同位並見第二卷

小耗

樞要歷曰亦月內之耗神也其日忌經營種蒔納財交易開市○歷例曰小耗者常居月建前五辰○曹震圭曰小耗者小損也乃月建氣絕之辰大耗之從神也並見第二卷

大時

神樞經曰大時者將軍之象也所直之日忌出軍攻戰築室會親○李鼎祚曰大時者正月起卯逆行四仲○淮南子曰大時者咸池也○曹震圭曰大時者乃

月建三合五行沐浴之辰也蓋五行至此則敗絕是最凶之辰也故曰大凶之時

小時

神樞經曰小時者郎將之象也其日忌結親姻開倉庫
○淮南子曰小時者月建也○曹震圭曰小時者是
當時之旺辰也忌結親姻者因陽氣獨持旺氣也忌
開倉庫者是旺氣發而不收也

四廢

廣聖歷曰四廢者四時衰謝之辰也其日忌出軍征伐
造舍迎親封建拜官納財開市○歷例曰春庚申辛
酉夏壬子癸亥秋甲寅乙卯冬丙午丁巳○蓬瀛經
曰四廢者是五行無氣福德不臨之辰百事忌用○
通書云春以庚辛為廢夏以壬癸為廢秋以甲乙為
廢冬以丙丁為廢春庚辛者而申酉亦屬金夏壬癸
者而子亥亦屬水秋甲乙者而寅卯亦屬木冬丙丁
者而已午亦屬火謂之支干連見○曹震圭曰四廢

者干支俱絕也假令庚申辛酉絕於春寅卯辰也他
倣此

四窮

總要歷曰四窮者謂亥為陰絕之辰以四時旺干臨之
故曰四窮所直之日不可遠行征伐出納財物○歷
例曰春乙亥夏丁亥秋辛亥冬癸亥○曹震圭曰亥
者地支末辰極陰之位以四時陰干配之故曰四窮
四耗

總聖歷曰四耗者謂四時休干臨分至之辰也其日忌會親姻出師開倉庫施債負○歷例曰春壬子夏乙卯秋戊午冬辛酉○曹震圭曰物之將分者必散也至者盡也是陰陽數盡而將分也又得休干臨之故曰耗

按四耗日固是休干亦休支也春壬子幹枝皆水夏乙卯幹枝皆木冬辛酉幹枝皆金秋戊午幹土而枝火洞源經云火不尅金何旺土生金火亦生金也蓋

春木旺則水耗夏火旺則木耗秋金旺則火土耗冬水旺則金耗故曰四耗

四擊

四擊者春戌夏丑秋辰冬未

按四擊者四時所衝之墓辰也如正二三月建寅卯辰辰與戌衝故戌為四擊也餘倣此

五虛

樞要歷曰五虛者四時絕辰也其日忌開倉庫營種時

出財寶放債負○歷例曰五虛者春巳酉丑夏申子
辰秋亥卯未冬寅午戌也○曹震圭曰五虛者四時
逢絕之辰也物絕則損朽其中虛而無實也故曰虛
如春木旺巳酉丑金絕也夏火旺申子辰水絕也秋
金旺亥卯未木絕也冬水旺寅午戌火絕也

按五虛者三合五行絕胎養之位與歲神三殺起例
同

五墓

廣聖歷曰五墓者四旺之墓辰也其日忌營造起土嫁娶出軍○歷例曰五墓者正二月乙未四五月丙戌七八月辛丑十月十一月壬辰四季月戊辰也○曹震圭曰五墓者五行旺于自臨墓辰也十干者身之象若營造起土似臨於無氣之位也又以干為夫之象若嫁娶則夫自臨死氣之位也又以干為我若出軍征伐是自臨死墓之地也故忌之假如正二月木旺木墓於未加以乙未是自臨墓辰也餘倣此

九坎

廣聖歷曰九坎者月中殺神也其日忌乘船渡水修隄防築垣牆苫蓋屋舍○歷例曰九坎者正月在辰逆行四季五月在卯逆行四仲九月在寅逆行四孟○曹震圭曰坎者陷也險也不平也其忌如此義與次節九焦同

九焦

廣聖歷曰九焦者月中殺神也其日忌爐冶鑄造種植

修築園圃○歷例曰正月在辰逆行四季五月在卯
逆行四仲九月在寅逆行四孟○曹震圭曰九坎九
焦者是月中之殺神逆天地之道者也假令正二三
四為歲首東方之位當用孟辰以生萬物今則以季
辰收殺萬物是其逆也五六七八為歲中今雖用仲
辰成熟萬物然歲首不與其生焉有成熟哉九十一
一十二月為歲之終萬物收藏之時今方欲以孟辰
生育萬物豈能有生育哉是逆天地之道萬物無能

成就也

九空

廣聖歷曰九空者月內殺神也其日忌修造倉庫出入
貨財○歷例曰九空者正月在辰逆行四季○曹震
圭曰九空者墓庫破散之神也庫破則空衝則散假
令寅午戌月火庫在戌辰能衝散也亥卯未月木墓
在未丑能衝散也申子辰月水墓在辰戌能衝散也
己酉丑月金墓在丑未能衝散也今歷家所傳與九

坎九焦同行者非益所傳有誤紀歲厯亦止是逆行
四季

大殺

神樞經曰大殺者月中廉察也所直之日忌出軍征討
嫁娶納財豎柱上樑移徙置室○李鼎祚曰大殺者
正月在戌二月在巳三月在午四月在未五月在寅
六月在卯七月在辰八月在亥九月在子十月在丑
十一月在申十二月在酉○曹震圭曰東方之位生

育萬物南方之地成熟萬物西方之位殺伐萬物北方之位收藏萬物大殺者月中廉察也子丑寅月歷西方申酉戌者蓋謂陽氣將出萬物將生故巡察西方無以妄殺也卯辰巳月歷南方巳午未者謂萬物生長之時故巡察南方使有成熟也午未申月歷東方寅卯辰者謂萬物成熟宜在養育也酉戌亥月歷北方亥子丑者謂萬物收成使有斂藏也

劫殺

神樞經曰劫殺者劫害之辰也其日忌臨官視事納禮
成親戰伐行軍出入興販○李鼎祚曰正月起亥逆
行四孟○曹震圭曰劫殺者三合五行之絕神也
按劫殺起於絕並見第二卷

死氣

神樞經曰死氣者無氣之辰也其日忌戰鬪征伐療病
求醫安置產室經營栽植○李鼎祚曰死氣者常居
月建前四辰○曹震圭曰死氣者以月建為臨官前

臨死位也假令二月建卯為臨官帝旺在辰衰在巳病在午死在未也或云生氣之衝辰也謂此愛其生彼愛其死我旺而彼死也故常與生氣對衝

死神

神樞經曰死神者月中凶神也其日忌請醫服藥出師征討種植樹木進人納畜○李鼎祚曰常居月建前三辰○曹震圭曰死神者以月建為旺辰前逢死位也大抵死氣之前必有死神其義同前

遊禍

神樞經曰遊禍者月中惡神也其日忌服藥請醫祀神致祭○李鼎祚曰遊禍者正月起巳逆行四孟○曹震圭曰遊禍者三合五行臨官之神是對衝劫殺之位也

按遊禍者以其流行於四隅故曰遊以其過旺故曰禍

天獄

神樞經曰天獄者月中禁神也其日忌獻封章興詞訟
赴任征討○李鼎祚曰天獄者正月在子順行四仲
○曹震圭曰天獄者是三合五行胎位之辰也當正
月起子逆行非順行也恐傳之者有誤

天火

玉帳經曰天火者月中凶神也其日忌苫築壘垣牆
振旅興師會親娶婦○歷例曰天火者正月在子順
行四仲○曹震圭曰天火非天之火是五行旺辰中

藏陽火也假令寅午戌月在子蓋子中藏陽氣之火其勢最弱待寅午戌月火勢興旺以顯其光故子中有霹靂火也是水中之火見之於天也亥卯未月在卯蓋卯中有伏燄之火也火氣既生於寅至卯而木旺反蔽其燄而成炭又待亥卯未月木再生之故卯內有爐中火也申子辰月在午蓋午中有正旺之火其勢最大物莫敢侵其光反闇待申子辰月水勢將興反制其光上下俱明故午中有天上火也已酉丑

月在酉謂酉中有長生丁火如硫黃煤炭之類故待
己酉丑月金石之氣而再發旺也故酉中有山下之
火也且子中之陽火卯中之木火午中之旺火酉中
長生丁火莫非天道自然故以名之

地火

神樞經曰地火者月中凶神也其日忌修築園圃栽植
種蒔○歷例曰地火者正月起戌逆行十二辰○曹
震圭曰地火者陰奪陽也是陰建之權勢也○天文

志曰陰行陽之政物傷而必尅終以自害也竝見月厭節

天狗

樞要歷曰天狗者月中凶神也其日忌禱祀鬼神祈求福願○歷例曰天狗者常居月建前二辰○曹震圭曰天狗者月中禦衛之天也去除私邪之神無使敢侵故居建前二辰是禦於門首也自子建之月起於寅寅者艮之陽辰也易曰艮為犬是也祈福願祠鬼

神皆為正道故竝忌之

土符 土府 地囊

總要歷曰土符土府地囊皆土神也其日忌破土穿井
開渠築牆○歷例曰土符者正月丑二月巳三月酉
四月寅五月午六月戌七月卯八月未九月亥十月
辰十一月申十二月子○土府者與月建同行○地
囊者正月庚子庚午二月癸未癸丑三月甲子甲寅
四月巳卯巳丑五月戌辰戌午六月癸未癸巳七月

丙寅丙申八月丁卯丁巳九月戊辰戊子十月庚戌
庚子十一月辛未辛酉十二月乙未乙酉○曹震圭
曰土符者乃土地握符信之神使掌五土也假令春
木旺土受其尅故托子金以制之是春三月歷巳酉
丑也夏火旺土休賴火為母以養之故夏三月歷寅
午戌也秋金旺土相不畏木制故秋三月歷亥卯未
也冬水旺土亦剛堅賴水以柔和之故冬三月歷申
子辰也○土府者是土地之府庭也土為萬物之主

月建為月內萬神之主各隨四時而運蓋月建之體本土也以其居故曰府○地震者乃土地之庫藏也其義未詳

兵禁

總要歷曰兵禁者用兵凶辰也其日忌出師振旅閱武教戰○歷例曰兵禁者正月起寅逆行六陽辰○曹震圭曰兵家所利者陰道也所忌者陽道也故兵禁正月起寅逆行六陽辰也○又月令曰孟春之月不

可稱兵緝兵必天殃兵戎不起不可從我始故正月
以寅為禁辰也二月子相行四殺也三月戌耗破之
辰也四月申四殺三刑也五月午自刑也六月辰天
罡四殺也七月寅破耗三刑也八月子四殺死神也
九月戌河魁也十月申六害也十一月午破耗也十
二月辰四殺天罡也其忌可知

大敗

總要歷曰大敗者兵敗忌辰也其日忌臨陣侵敵攻城

野戰○歷例曰正月起卯逆行四仲○曹震圭曰大敗者三合五行沐浴休敗之辰也其氣敗絕無以勝彼其忌可知

伐日

遁甲經曰伐日者支尅干辰也其日忌攻討征伐出軍掠地○王璋曰伐日者庚午辛巳丙子戊寅己卯癸未癸丑甲申乙酉丁亥壬辰壬戌也○曹震圭曰伐者彼伐於我也六壬經云干為尊為我支為卑為彼

是卑伐於尊彼尅於我其義逆也故忌之

專日

經曰專日者謂支干五行相同也其日忌出軍○歷例
曰專日者甲寅乙卯丁巳丙午庚申辛酉癸亥壬子
戊辰戊戌己丑己未共十二日也○曹震圭曰六壬
經云幹為我枝為彼今幹枝同類是彼我同德兩勢
相敵不分勝負故忌出軍

按專日亦名和日

月厭

天寶歷曰月厭者陰建之辰也所理之方可以禳災祈福避病所直之日忌遠行歸家移徙婚嫁○歷例曰月厭者正月在戌逆行十二辰○曹震圭曰月厭者厭魅之神也其性暗昧私邪不正故各忌之蓋十一月建子陰陽氣爭冬至前陰氣極冬至後陽氣生故自建子之月陽建順歷丑寅卯一十二辰陰建逆歷亥戌酉一十二辰至五月夏至二氣又同建而相爭

也亦名曰陰建

按淮南子曰北斗之神有雌雄十一月起運於子月
徙一辰雄左行雌右行五月合於午謀刑十一月合
於子謀德太陰所居辰為厭日厭日不可以舉百事

厭對

天寶歷曰厭對者月厭所衝之辰也其日忌嫁娶○歷
例曰厭對者正月起辰逆行十二辰

往亡 氣往亡

堪輿經曰往者去也亡者無也其日忌拜官上任遠行
歸家出軍征討嫁娶尋醫○厯例曰往亡者正月在
寅二月在巳三月在申四月在亥五月在卯六月在
午七月在酉八月在子九月在辰十月在未十一月
在戌十二月在丑○又氣往亡者立春後七日驚蟄
後十四日清明後二十一日立夏後八日芒種後十
六日小暑後二十四日立秋後九日白露後十八日
寒露後二十七日立冬後十日大雪後二十日小雪

後三十日皆自交節日數之○曹震圭曰往亡者往而不反之意也孟者初也仲者中也季者末也蓋歲之始中終之義也正二三月乃歲之初皆以四孟辰為之乃五行初生之地是生氣之道往而亡也五六七八月乃歲之中皆以四仲辰為之蓋四仲者五行當旺之辰是旺氣之道往而亡也九十一十二月乃歲之終皆以四季辰為之謂四季者乃五行終墓之地是萬物皆歸往而亡也又氣往亡者以四立

月往亡之辰三合化象之成數言之也假令正月立春寅為往亡寅午戌合火局火之成數七也四月立夏卯為往亡亥卯未合木局木之成數八也七月立秋酉為往亡巳酉丑合金局金之成數九也十月立冬未為往亡土無化象便以本行土為之其成數十也各倍之為次月往亡日三之為下月往亡日也獨水數不用者蓋四立之月往亡無申子辰日也然一歲之內四季之月以辰為首辰月以申為往亡申合

水局水之成數六也故三月中氣後六日九月中氣
後十二日各得往亡六月則土旺後二六一十二日
十二月土旺後三六一十八日亦得往亡或節氣加
時早晚間有差一日者然其理大槩如此○通書云
唐太宗曰宋武帝以往亡起兵軍吏以為不可帝曰
我往彼亡果克之由此言之可廢明矣

歸忌

廣聖歷曰歸忌者月內凶神也其日忌遠行歸家移徙

娶婦○厯例曰孟月丑仲月寅季月子○曹震圭曰子者一陽丑乃二陽寅乃三陽蓋此三辰陽氣始盛主動於外不可反歸於內也

按孟月忌丑仲月忌寅季月忌子者皆忌退後一辰所謂歸忌也如子為仲丑為季寅為孟故孟月忌退歸於季仲月忌退歸於孟季月忌退歸於仲也

章光

堪輿經曰章光者陰建前辰也其日忌嫁娶○厯例曰

常居陰建前一辰也○曹震圭曰章光者能為月厭
彰顯其道故曰章光

無翹

天寶歷曰無翹者翹猶尾也陽烏所主陰則無之常居
厭後故曰無翹其日忌嫁娶○曹震圭曰翹猶首翹
婦人之飾也無翹者是無其飾也故忌嫁娶

咸池 招搖 八風 觸水龍

樞要歷曰咸池招搖八風觸水龍所直之日忌乘船渡

水涉江河○歷例曰咸池者正月起卯逆行四仲招搖者正月起辰逆行十二辰八風者春丁丑巳酉夏甲申甲辰秋辛未丁未冬申戌甲寅觸水龍者丙子癸丑癸未也○曹震圭曰咸池者三合五行沐浴之辰是陽建之浴地也五行至此皆值沒溺其忌可知招搖者動而不安陰建之衝也故與六儀同行又天文志有招搖之星在梗河亢池之左角亢之次辰宮也故正月起辰八風者是八節八卦之風也各以四

立之建後一辰為四立之風以其三合前辰為次節
風如立夏建巳以辰為立夏風也申為三合前辰為
夏至風是也假令立春建寅以建前丑為正風以丁
配之取溫和之意也以酉為傍風配之以巳取巳土
長生之地也立夏建巳以辰為正風申為傍風皆以
甲配之者立夏之後風勢極微故配甲以生之也立
秋建申以未為正風而不取傍風者謂秋氣好殺而
無養育之性以辛配之取金風之象又以丁配之存

其溫和之氣也立冬建亥以戌為正風寅為傍風皆以甲配之者以風鳴冬其勢極大配之以甲木以生風也共為八節故曰八風觸水龍者觸犯也龍水物也壬癸亥子水也能與水相勝者火土也火在上為丙土居下為四季辰乃龍之正位壬水所居戌亥為乾天之位有龍象焉故惟餘丙子癸未癸丑為觸水龍日也

血忌 血支

樞要經曰血忌血支其日忌針刺出血○歷例曰血忌者正月丑二月未三月寅四月申五月卯六月酉七月辰八月戌九月巳十月亥十一月午十二月子血支者正月在丑順行十二辰○曹震圭曰血支者氣血之支流也故起於旺建之後生氣之前如人生之後自有血脈暢於四肢若其日針刺者是去其血也故忌之血忌者以人之血脈出入往來一噓一吸運動不息故一歷本位一居其衝亦陰陽各相配之義

也故建陽之月則歷於丑寅卯辰巳午陽氣之位建陰之月則歷於未申酉戌亥子陰氣之位與續世義同正月與血支同起於丑者正月陰陽交泰血氣通和然後流布於四肢也

官符

總要歷曰官符者其日忌拜官視事上表章陳詞訟○
歷例曰官符者正月起午順行十二辰○曹震圭曰
官符者是歲月中掌符信之官文權之職也常居三

合前辰大抵歲辰月建以其三合前辰為文官後辰
為武職是左文右武之義假令正月建寅則午上有
官符文權也戌上有白虎武職也併見第二卷

天吏

樞要歷曰天吏者月中凶神也其日忌臨官赴任遠行
詞訟○歷例曰天吏者正月起酉逆行四仲○曹震
圭曰天吏者三合五行死氣之位五行至此死而無
氣乃天之凶吏全無生意也其忌可知

臨日

樞要歷曰臨日者上臨下之義也其日忌臨民訴訟○
歷例曰臨日者正月午二月亥三月申四月丑五月
戌六月卯七月子八月巳九月寅十月未十一月辰
十二月酉○曹震圭曰臨者上臨於下也是陽建之
使臣奉上命以授百官者也建陽之月在三合前辰
是臨於文官官符也建陰之月在三合後辰是臨於
武職白虎也

天賊

神樞經曰天賊者月中盜神也其日忌遠行○李鼎祚曰天賊者正月在丑逆行十二辰○曹震圭曰天賊者盜神也常居天倉後辰蓋倉庫之後必有盜也

致死

樞要歷曰致死者月中凶神也其日忌求醫藥○歷例曰致死者正月起酉逆行四仲○曹震圭曰致死者月建三合五行死敗之辰也與天吏同

牢日 獄日 徒隸 死別 伏罪 不舉

罪刑

壇經曰牢日獄日徒隸死別伏罪不舉罪刑其日皆不宜臨官視事登壇受職○歷例曰牢日者春辰夏未秋戌冬丑也獄日者春未夏戌秋丑冬辰也徒隸者春申夏亥秋寅冬巳也死別者春戌夏丑秋辰冬未也伏罪者春亥夏寅秋巳冬申也不舉者春子夏卯秋午冬酉也罪刑者春丑夏辰秋未冬戌也○曹震

圭曰牢日者四時衰謝之辰也衰在墓地故曰牢獄
日者四時墓辰也入於墓故曰獄徒隸者是四時五
行絕辰也置之於卑賤也死別者以其將死而又歸
於墓是四時五行死辰之墓也如春屬木死於午午
為火戌為火墓是也伏罪者是子見其母也蓋為子
有罪父母責之故云伏罪也不舉者是四時五行沐
浴之辰似初沐浴而未冠帶之象不可舉薦於上人
也罪刑者四時五行相刑之墓辰也如春金尅木金

墓在丑也餘倣此

蚩尤 飛流 天棒 陰私 土勃 雷公

樞要經曰蚩尤飛流天棒陰私土勃雷公月內黑道也其日忌開掘取土立柱上樑嫁娶出行臨官視事○

歷例曰蚩尤者正月起寅天棒者正月起午雷公者正月起子皆順行六陽辰飛流者正月起卯陰私者正月起酉土勃者正月起亥皆順行六陰辰并解見月事吉神篇

天刑 朱雀 白虎 天牢 元武 勾陳

神樞經曰天刑朱雀白虎天牢元武勾陳者月中黑道也所理之方所直之日皆不可興土功營屋舍移徙遠行嫁娶出軍○李鼎祚曰天刑者正月起寅白虎者正月起午天牢者正月起申皆順行六陽辰朱雀者正月起卯元武者正月起酉勾陳者正月起亥皆順行六陰辰并解見月事吉神篇

八龍 七鳥 九虎 六蛇

總要歷曰八龍七鳥九虎六蛇其日皆不可迎婚嫁娶
○歷例曰春甲子乙亥為八龍夏丙子丁亥為七鳥
秋庚子辛亥為九虎冬壬子癸亥為六蛇○曹震圭
曰亥者陰氣之極子者陽氣初生是陰陽氣絕脫謝
之辰也十干象夫十二支象婦今以四時旺干而配
亥子是夫旺而婦絕且我臨於絕地也故忌用之
按甲乙者東方木也為青龍其成數八丙丁者南方
火也為朱雀其成數七庚辛者西方金也為白虎其

成數九壬癸者北方水也為龜蛇其成數六故各因以為名也

九醜

金櫃經曰乙者雷電始發之日戊己者北辰位下之日辛者萬物決斷之日壬者三光不照之日子午卯酉四仲之辰日月之門陰陽之界五千臨此四辰其日不可出軍嫁娶移徙築室○曹植曰九醜者乙卯己卯辛卯乙酉己酉辛酉戊午戊子壬午壬子○曹震

圭曰卯酉為日月出入之門子午為陰陽交爭之界
乙為六合辛為太陽壬為元武己為六賊戊為勾陳
故此五干加此四辰名曰醜又以五千四辰其共數
九故以名之

八專

曾門經曰八專日忌出軍嫁娶○曹植曰八專者丁未
己未庚申甲寅癸丑也

按六壬日辰課體訣曰甲寄居寅乙寄辰還將丙戊

巳宮尋未支丁巳藏功用申地庚金作主盟辛在戌
宮癸寄丑壬干原寄在登明二盤四正無差錯運式
通靈動鬼神蓋即十干祿辰除子午卯酉四正不用
故移於辰戌丑未而各取其干支所配之日是為八
專今六壬三傳起例用之如甲祿在寅卯不用故乙
在辰辰中亦有乙未也丙戌祿在巳午不用故丁巳
在未也庚祿在申酉不用故辛在戌壬祿在亥子不
用故癸在丑相配止有五日以其干支比和故為專

同專日取義以十二支除四正不用餘八故為八專也

五離

樞要歷曰五離者月中離神也其日忌結婚姻會親友作交關立契券○歷例曰五離者申酉日是也○曹震圭曰五離者是陰陽重會之辰也再合則離義見月吉神五合節

重日

天寶厯曰重日者以陰陽混合於亥陽起於甲子而順陰起於甲戌而逆至巳亥而同故曰重日其日忌為凶事利為吉事○厯例曰重日者巳亥二日也○曹震圭曰亥為陰極之位坤辟在焉巳為陽極之位乾辟在焉是陽中陽而陰中陰也故曰重其日忌為凶事者恐重犯也利為吉事者宜再見也

復日

天寶厯曰復日者為魁罡所繫之辰也其日忌為凶事

利為吉事○歷例曰復日者正七月甲庚二八月乙
辛四十月丙壬五十一月丁癸三九六十二月戊己
日也○曹震圭曰復者重見也為本建之辰與所遇
之干同也假令正月寅即甲也而又見甲是復也又
如辰戌即戌也丑未即巳也而又見戌巳是復也餘
倣此又地理新書云正月甲七月庚二月乙八月辛
四月丙十月壬五月丁十一月癸三月九月戌六月
十二月己

四離

玉門經曰離者陰陽分至前一辰也謂建卯之月陽氣出陰氣入建子之月陰氣降陽氣升建酉之月陰氣出陽氣入建午之月陽氣降陰氣升故先一日為四離辰也○李鼎祚曰此日忌出行征伐○曹震圭曰四離者冬至前一日水離夏至前一日火離春分前一日陽體分而木亦離也秋分前一日陰體分而金亦離也故名曰四離

四絕

玉門經曰四絕者四立前一辰也○李鼎祚曰此日忌
出軍遠行○曹震圭曰立春木旺水絕立夏火旺木
絕立秋金旺土絕立冬水旺金絕故先一日為絕也

長短星

歷例曰長星者正月初七二月初四三月初一四月初
九五月十五六月初十七月初八八月初二初五九
月初三初四十月月初一十一月十二十二月初九是

也○短星者正月二十一二月十九三月十六四月二十五五月二十五六月二十七月二十二八月十八十九九月十六十七十月十四十一月二十二十二月二十五日是也其日忌開市納財立券交易裁衣○曹震圭曰長者過也短者不及也凡開市納財立券交易裁衣皆貴乎中平適宜若或過或不及其忌可知蓋長短星者金火也謂金火之氣能毀傷萬物也

按長星者庚辛也春夏用庚秋冬用辛陽取陽陰取陰也以月建內所寄之干四季則用四時陰干依五虎元遁得庚辛者自建辰向前數之春夏至庚則止秋冬至辛則止其本節所當之卦則取其宮數如春月則以卯為震三四月則以巳為巽四其餘辰則一辰當一得數是也假如正月建寅寅中有甲以甲遁得庚午自寅一震三辰一巳一午一共得七數故七日為長星也二月建卯卯中有乙以乙遁得庚辰自

卯之震三併辰一共四數故四日為長星也三月建
辰辰中無所寄就乙仍遁得庚辰止得一數故一日
為長星也四月建己巳中有丁以丁遁得庚戌自己
之巽四歷午未申酉戌共九數也午不用離九者以
巳用巽四故也五月建午午中有丙以丙遁得庚寅
為丙火長生之位故向前得庚子自離九歷未申酉
戌亥子得一十五也六月建未就丁遁得庚戌自未
申歷酉之兌七至戌共得一十也用兌七者以六月

為金氣伏藏之時故用西方之卦也七月建申申中有庚為同體又以秋冬用辛故不用遁辰而用旺辰之酉自申至酉之兌七共得八數也八月建酉酉中有辛故即得兌七也今為二日五日合之亦得七九月建戌就辛遁得庚子辛丑自戌至子得三自戌至丑得四也不用宮數者以戌尚西方之令未至於乾也十月建亥亥中有癸遁得辛酉謂干支同體故用壬遁得辛亥故止得一也十一月建子子中有壬遁

得辛亥故自子之坎一至亥得十二也十二月建丑
就癸遁得辛酉自丑至酉得九也不用宮數與九月
同○短星者丙丁也春夏用丙秋冬用丁陽取陽陰
取陰也各以月建內所寄之干四季則用四時陰干
依五子遁得丙丁者自建辰向前數之春夏至丙則
止秋冬至丁則止其本節所當之卦則取其宮數其
餘辰則一辰當一得數于朔實二十九日內減之餘
數是也假如正月甲遁得丙寅寅為艮八以減二十

九餘二十一故二十一日為短星也二月乙遁得丙戌自卯之震三至戌得一十以減二十九餘一十九也三月就乙遁得丙子自辰一歷巽四至子得一十三以減二十九餘一十六也四月丁遁得丙午為干支同體故即用旺辰之巽四以減二十九餘二十五也五月丙遁得丙申自午至申之坤二共四以減二十九餘二十五也六月就丁遁得丙午為干支同體故即用旺辰得午之離九以減二十九餘二十也七

月庚遁得丁丑自申之坤二歷酉戌亥子丑得七以減二十九餘二十二也八月辛遁得丙申丁酉自兌七至申得一十八至酉得一十九也不以減二十九者以其在一十六以上也九月就辛遁得丙申丁酉故自戌至申得一十一至酉得一十二不用宮數與長星同以減二十九餘十八十七也今為十六日十七日者未知孰是十月建亥用癸遁得丁巳自亥之乾六至巳得十二以減二十九餘一十七也今為十

四日者未知孰是大抵長星應在十五以前短星應在十六以後恐傳者誤也十一月壬遁得丙午以子丑之月水旺火寒又為丙胎養之位故復用也自子之坎一至午得七以減二十九餘二十二也十二月就癸遁得丙辰自丑至辰得四以減二十九餘二十五也不用宮數與長星同○又按長星用五虎遁短星用五子遁者長星金也陰也短星火也陽也陰金胎於寅陽火胎於子也酉月金旺戌月火墓又為西方之

位既取能傷萬物之義則其各二日也宜矣


反支

歷例曰反支以月朔得戌亥日者初一日得申酉日者初二日得午未日者初三日得辰巳日者初四日得寅卯日者初五日得子丑日者初六日為反支也其日忌上表章

按十二支皆以順布今自戌亥而逆之是反支也其忌可知

上朔

堪輿經曰上朔日忌宴會嫁娶遠行上官○厯例曰陽年以年干加寅順數至亥陰年以年干加丑順數至巳也○曹震圭曰丑寅者艮卦之方也萬物始終之所也已者陽極之辰亥者陰極之辰故陽有生發萬物之功者寅也陰有成終萬物之道者丑也以陽而求會於極陰以陰而往會於極陽則非其相會之道也其忌可知



御定星厯考原卷四

欽定四庫全書

御定星厯考原卷五

日時總類

月建十二神

厯書曰厯家以建除滿平定執破危成收開閉凡十二日周而復始觀所值以定吉凶每月交節則疊兩值日其法從月建上起建與斗杓所指相應如正月建寅則寅日起建順行十二辰是也○淮南子曰正月建

寅則寅為建卯為除辰為滿巳為平主生午為定未
為執主陷申為破主衡酉為危主杓戌為成主小德
亥為收主大德子為開主太陽丑為閉主太陰○選
擇宗鏡曰建為歲君為元神為吉凶衆神之主帥可
坐不可向其山在方疊吉星則大吉疊凶星則凶
除為四利太陽小吉滿為土瘟為四利喪門又為天
富小吉平為三台又為土曲大吉定為歲三合為顯
星吉又為地官符畜官次凶執為四利之死符又為

小耗凶破為歲破為大耗大凶危為極富星為谷將
星為四利龍德吉成為三合吉又為飛廉又為四利
白虎小凶收為四利福德小吉又為八座小凶開為
青龍太陰為生氣華蓋上吉又為四利弔客小凶開
為病符凶平成開危最吉定除次吉破大凶

按月建十二神除危定執成開為吉建破平收滿閉
為凶歷書所謂建滿平收黑除危定執黃成開皆可
用閉破不相當者也選擇宗鏡以四利三元諸神相

配吉凶亦未盡合如以建為太歲除為太陽滿為喪
門破為歲破危為龍德此相合者也至以平為太陰
定為官符執為死符成為白虎收為福德開為弔客
此不相合者也大抵凡日吉神多則吉凶神多則凶
又各視其神之宜忌以為趨避亦未可以執一而論
也

四利三元

李淳風四利三元一太歲二太陽三喪門四太陰五官

符六死符七歲破八龍德九白虎十福德十一弔客
十二病符如甲子年則以太歲加子丑為太陽寅為
喪門餘倣此

黃黑二道

按黃黑二道者黃道六黑道六共十有二以配十有二
辰一青龍二明堂三天刑四朱雀五金匱六天德七
白虎八玉堂九天牢十元武十一司命十二勾陳其
法則寅申青龍起子卯酉起寅辰戌起辰巳亥起午

子午起申丑未起戌順行十二辰月起日則建寅之
月子日為青龍丑日為明堂日起時則子日申時起
青龍酉時為明堂依次順數其義見月事凶神篇

天乙貴人

歌曰甲戌庚牛羊乙巳鼠猴鄉丙丁豬雞位壬癸兔蛇
藏六辛逢馬虎此是貴人方○曹震圭曰天乙者乃
紫微垣左樞傍之一星萬神之主掌也一日二者陰
陽分治內外之義也辰戌為魁罡之位故貴人不臨

戊以配中央之位乃勾陳后宮之象故與甲同其起
例以丑乃紫微後門之左陽界之辰也未乃紫微南
門之右陰界之辰也甲者十干之首故陽貴以甲加
丑逆行甲得丑乙得子丙得亥丁得酉巳得申庚得
未辛得午壬得巳癸得卯此晝日之貴也陰貴以甲
加未順行甲得未乙得申丙得酉丁得亥巳得子庚
得丑辛得寅壬得卯癸得巳此暮夜之貴也戊以助
甲成功故亦得丑未若六辛之獨得寅午則自然所

致更無疑矣

又通書云郭景純以十干貴人為吉神之首至靜而能制羣動至尊而能鎮飛浮以其為坤黃中通理乃貴人之德是以陽貴人出於先天之坤而順陰貴人出於後天之坤而逆天干之德未足為貴而干德之合氣乃為貴也

先天坤卦在正北陽貴起於先天之坤故從子起甲甲德在子氣合於己故己以子為陽貴以次順行乙德

在丑氣合於庚丙德在寅氣合於辛丁德在卯氣合
於壬辰為天羅貴人不居故戌跨在巳氣合於癸午
與先天坤位相對名曰天空貴人有獨無對故陽貴
人不入於午巳德在未氣合於甲庚德在申氣合於
乙辛德在酉氣合於丙戌為地網貴人不居故壬跨
在亥氣合於丁子坤位貴人不再居故癸在丑氣合
於戌是為陽貴起例

申

庚合乙

酉

辛合丙

戌

地網

亥

壬合丁

未

巳合甲

子

甲合巳

午

天空

丑

乙合庚
癸合戊

巳

戊合癸

辰

天羅

卯

丁合壬

寅

丙合辛

歌曰庚戌見牛甲在羊乙猴巳鼠丙鷄方丁豬癸蛇
壬是兔六辛逢虎貴為陽此十干先天相合之氣屬
陽故從子位順行分居地盤九支謂之陽貴人旦晝
於冬至後用之

後天坤卦在西南陰貴起於後天之坤故從申起甲甲

德在申氣合於巳故巳以申為陰貴以次逆行乙德在未氣合於庚丙德在午氣合於辛丁德在巳氣合於壬辰為天羅貴人不居故戊跨在卯氣合於癸寅與後天坤位相對名曰天空貴人有獨無對故陰貴人不入於申巳德在丑氣合於甲庚德在子氣合於乙辛德在亥氣合於丙戌為地網貴人不居故壬跨在酉氣合於丁申坤位貴人不再居故癸跨在未氣合於戊是為陰貴起例

申

甲合巳

酉

壬合丁

戌

地網

亥

辛合丙

未

乙合庚
癸合戊

子

庚合乙

午

丙合辛

丑

巳合甲

巳

丁合壬

辰

天羅

卯

戊合癸

寅

天空

歌曰甲貴陰牛庚戌羊乙貴在鼠巳猴鄉丙豬丁鷄

辛遇馬壬蛇癸兔屬陰方此十干後天相合之氣屬

陰故從申位逆行分居地盤九支謂之陰貴人暮夜

於夏至後用之

按曹氏與通書二說各有意義但曹氏則以陽為陰以陰為陽夫陽順陰逆陽前陰後自然之理也當以起未而順者為陽起丑而逆者為陰方是

喜神

歌曰甲巳在艮乙庚乾丙辛坤位喜神安丁壬寄向離宮坐戌癸還依巽上看○曹震圭曰大抵物之所喜者母見子也假令甲巳化土生金為子金之所居者丑也丑近於艮丙辛化水生木為子木之所居者未

也未近於坤戊癸化火生土為子土居於辰近於
巽也乙庚化金生水為子水居於辰辰既有土故居
於乾乾為亥子也丁壬化木生火為子火旺於午離
也

按物以相見為喜易傳曰相見乎離離者南方之卦
也於五行為火於十干為丙喜神者見丙也假令甲
巳之干用五虎元起丙寅寅為艮故在艮也乙庚之
干得丙戌戌為乾故在乾也丙辛之干得丙申申為

坤故在坤也丁壬之干得丙午午為離故在離也戊癸之干得丙辰辰為巽故在巽也

二十八宿配日

按日有六十宿有二十八四百二十日而一週四百二十者以六十與二十八俱可以度盡也故有七元之說一元甲子日起虛以子象鼠而虛為日鼠也二元甲子起奎三元甲子起畢四元甲子起鬼五元甲子起翼六元甲子起氐七元甲子起箕至七元盡而甲

子又起虛周而復始但一元起於何年月日則不可得而考矣

二十八宿直日所屬七曜及異名

虛昴星房為太陽蚤日危畢張心為太陰莫日室紫翼尾屬火壁參軫箕屬水奎井角斗屬木婁鬼亢牛屬金胃柳氏女屬土

十二辰禽象分陰陽

十二辰禽象以二十八宿之列於十二宮者配之既見

首卷又有以十二象分陰陽者子前四刻為昨夜之陰後四刻為今日之陽猶冬至前為陰冬至後為陽也故鼠前足四爪後足五爪丑屬陰故牛蹄分寅屬陽故虎五爪卯屬陰故兔缺唇且四爪辰屬陽故龍五爪巳屬陰故蛇舌分午屬陽故馬蹄圓未屬陰故羊蹄分申屬陽故猴五爪酉屬陰故鷄四爪戌屬陽故狗五爪亥屬陰故猪蹄分

旬中空七

旬中空亡者甲子旬中戌亥空甲戌旬中申酉空甲申
旬中午未空甲午旬中辰巳空甲辰旬中寅卯空甲
寅旬中子丑空

按十日為旬以十干配十二支自甲至癸而止餘二
辰天干不及故為空亡也如甲子起至癸酉止不及
戌亥故甲子旬十日皆以戌亥為空餘倣此

截路空亡

截路空亡者甲巳日申酉時乙庚日午未時丙辛日辰

巳時丁壬日寅卯時戊癸日子丑時

按截路空亡遇壬癸也行路而遇水則不可行也如
甲巳日以五鼠遁起甲子順歷之得壬申癸酉故甲
巳日以申酉為截路空亡也餘倣此

五等用卦

歷例曰冬至公中孚始辟復侯屯內小寒侯屯外大夫
謙卿睽大寒公升辟臨侯小過內立春侯小過外大
夫蒙卿益雨水公漸辟泰侯需內驚蟄侯需外大夫

隨卿晉春分公解辟大壯侯豫內清明侯豫外大夫
訟卿蠱穀雨公革辟夬侯旅內立夏侯旅外大夫師
卿比小滿公小畜辟乾侯大有內芒種侯大有外大
夫家人卿井夏至公咸辟姤侯鼎內小暑侯鼎外大
夫豐卿渙大暑公履辟遯侯恒內立秋侯恒外大夫
節卿同人處暑公損辟否侯巽內白露侯巽外大夫
萃卿大畜秋分公賁辟觀侯歸妹內寒露侯歸妹外
大夫无妄卿明夷霜降公困辟剝侯艮內立冬侯艮

外大夫既濟卿噬嗑小雪公大過辟坤侯未濟內大雪侯未濟外大夫蹇卿頤

按五等用卦皆出於漢儒焦延壽京房之說所謂卦氣者也今歷無之姑存於此

三伏

歷例曰三伏者四時代謝皆以相生立春以木代水水生木也立夏以火代木木生火也立冬以水代金金生水也至於立秋以金代火金畏火尅故至庚日則

必伏藏庚者金也金氣伏藏則火益熾三陽數也故夏至後第三庚為初伏第四庚為中伏立秋後初庚為末伏謂之三伏如夏至日得庚便為初庚立秋日得庚亦即為末伏也

二社

孝經緯曰社者土地之主也封土為社以報土功也○
歷例曰二分前後近戌為社○曹震圭曰勾龍共工能平水土祀以為社后稷能殖百穀祀以為稷社為

土神稷為穀神今以二分之氣祭者謂春分萬物發生百穀將種所以祈也秋分萬物成熟百穀將收所以報也

得辛

龍治水附

自元旦日干順數至幾日逢辛日者即為得辛自元旦日支順數至幾日逢辰日者即為幾龍治水

朔日

按朔者日月交會之辰也月本無光借日光以為光遠

則光顯近則光隱合朔日月同宮近度故不見月若復南北同度則日為月所蔽而日為之食矣故日食在朔

上弦

按上弦者周天四分之一也月猶銀丸受光含影自合朔後去日漸遠日照其西故自下視之如銀鉤然是三日而哉生明也至初八日間去日九十度日照其半西明而東暗如弓弦之平分也因自虧而向盈故

曰上

望日

按望日者日月相望之辰也日月相衝日在地下月在天上相距六宮對照而光滿若南北同度則月值暗虛恰為地影所隔而月為之食矣故月食在望

下弦

按下弦者周天四分之三也自望而後去日漸近日照其東而西虧是望後哉生魄也至二十三日間西去

日二百七十度東去日九十度日照其半東明而西
暗亦猶上弦之平分皆所謂近一而遠三也因自盈
而向虧故曰下

晦日

按晦日者月之盡也去日甚近將與日合其光晦隱而
不見至朔則既合而光復生朔者蘇也月死於晦而
復蘇於朔也故晦日百事不宜○又歷例曰晦朔弦
望之辰忌服藥療病○曹震圭曰晦朔弦日者陰氣

不足之辰也望日者陰奪陽也故其日忌服藥療病

減日 沒日

歷例曰減沒日忌療病服藥○曹震圭曰減日者積朔虛分而為之沒日者積氣盈分而為之非天地之全氣也故其日忌療病服藥

按減日沒日見於漢書詳載於授時歷今歷無之
月忌日

通書云俗忌初五十四二十三年年月月在人間其法

以五黃土值日相配廉貞火生起中宮之土也每月
初一日起一白水入中宮與貪狼木相配水木相生
也初二日二黑土與巨門土相配比和也初三日三
碧木能制綠存土也初四日四綠木與文曲水相生
也初五日五黃土配廉貞火火生土旺火晦土湮而
已初十十九又數一白貪狼至十四二十三又值五
黃廉貞此俗忌也

按九宮之次自一白至九紫九星之次則一貪狼二

巨門三祿存四文曲五廉貞六武曲七破軍八左輔
九右弼故其相配如此又以其日為九五之數自初
一至初五五數也自初五至十四自十四至二十三
皆距九日世不敢用假言其忌故曰俗忌也

人神

天寶歷曰人神者人之神識也其逐日所在忌用鍼灸
○曹震圭曰人神者非人之神識也是六氣陰陽所
在表裏也黃帝內經靈樞經甲乙經所載一日足大

指厥陰分刺灸之發跗腫二日外踝少陽分刺灸之
陽經筋緩三日在股少陰分刺灸之小腹痛四日腰
太陽分刺灸之腰僂無力五日在口太陰分刺灸之
舌強六日兩手陽明分刺灸之咽喉不利七日內踝
少陰分刺灸之陰經筋急八日手腕太陰分刺灸之
腕不收九日在尻厥陰分刺灸之主多病結十日腰
背太陽分刺灸之腰背僂十一日鼻柱陽明分刺灸
之齒面腫十二日髮際少陽分刺灸之令人耳重聽

十三日牙齒少陰分刺灸之氣寒十四日胃腕陽明
分刺灸之氣脹十五日遍身不補不瀉刺灸大禁十
六日在胃太陽分刺灸之主逆息十七日氣衝陽明
分刺灸之喘息十八日在股少陰分刺灸之陰氣痛
十九日在陽明分刺灸之發腫二十日內踝少陰分
刺灸之經筋癰二十一日手小指太陽分刺灸之手
不仁二十二日足外踝少陽明分刺灸之經筋緩二
十三日肝及足厥陰分刺灸之發轉筋二十四日手

陽明分刺灸之咽中不利二十五日足陽明分刺灸之胃氣脹二十六日在胃太陰分刺灸之令人喘咳二十七日在膝陽明分刺灸之足脛厥逆二十八日在陰少陰分刺灸之小腹急痛二十九日膝脛厥陰分刺灸之筋痿少力三十日陽明分月空亡不瀉不治故以其所在謂之人神

逐建人神

建日在足除日在尻滿日在腹平日在背定日在心執

日在手破日在口危日在鼻成日在肩收日在頭開
日在耳閉日在目

十二辰人神

子在目丑日在耳寅日在胃卯日在鼻辰日在腰巳
日在手午日在心未日在足申日在肩酉日在頭戌
日在頸亥日在項○曹震圭曰以上人神所在之日
並忌鍼灸

日遊神

經曰遊神所在不可安產室掃舍宇設牀帳○歷例曰
癸巳至丁酉日在北戊戌巳亥日在中庚子辛丑壬
寅日在南癸卯日在西甲辰日至丁未日在東戊申
又在中巳酉日出遊四十四日其義未明

太白逐日遊方

歷例曰一日十一日二十一日震方二日十二日二十
二日巽方三日十三日二十三日離方四日十四日
二十四日坤方五日十五日二十五日兌方六日十

六日二十六日乾方七日十七日二十七日坎方八
日十八日二十八日艮方九日十九日二十九日在
天十日二十日三十日在地也○曹震圭曰太白者
金神之氣巡遊八方所在不可抵向

按一日初起於震者所謂帝出乎震也終於艮者所
謂成言乎艮也皆依後天八卦之序依次遞遷至八
而八卦盡矣九為陽數故在天十為數終故在地今
歷目所載則九日十九日二十九日中央十日二十

日三十日在天未詳孰是

無祿日

通書云甲辰乙巳庚辰辛巳丙申戊戌丁亥己丑壬申
癸亥此十日祿皆落空故云無祿如甲祿在寅乙祿
在卯甲辰旬寅卯空故甲辰乙巳為無祿也庚祿在
申辛祿在酉甲戌旬申酉空故庚辰辛巳為無祿也
丙戌祿在巳甲午旬巳空故丙申戊戌為無祿也丁
巳祿在午甲申旬午空故丁亥己丑為無祿也壬祿

在亥甲子旬亥空故壬申為無祿也癸祿在子甲寅
旬子空故癸亥為無祿也此十日名曰無祿日又曰
十惡大敗日然惟隨各年及本命避之如庚戌年及
庚戌生人忌用甲辰之類是也

四煞沒時

又曰四大吉時

四煞者寅午戌火煞在丑亥卯未木煞在戌申子辰水
煞在未巳酉丑金煞在辰凡取四煞沒時者以月將
加時使四煞臨乾坤艮巽之位為四煞沒於四維正

四七十四孟月用甲丙庚壬時二五八十一四仲月
用艮巽坤乾時三六九十二四季月用癸乙丁辛時
如正月月將在亥則以亥加甲或加丙或加庚或加
壬依二十四方位順推之則辰戌丑未四煞皆臨四
維卦位是為四煞沒時也以四煞既沒故又曰四大
吉時

陰陽大會

堪輿經曰正月大會甲戌二月大會乙酉五月大會丙

午六月大會丁巳七月大會庚辰八月大會辛卯十
一月大會壬子十二月大會癸亥○正月陽建在寅
陰建在戌陽主于陰主支也陽建在寅近於甲陽甲
陰戌支于相和會故甲戌為正月大會也二月陽建
於卯陰建於酉卯近於乙陽乙陰酉故乙酉為二月
大會也五月陰陽二建俱會於午午近於丙以丙配
午故丙午為五月大會也六月陽建於未陰建於巳
未近於丁以丁配巳故丁巳為六月大會也七月陽

建於申陰建於辰陽建近庚以庚配辰故庚辰為七月大會也八月陽建於酉陰建於卯酉近於辛以辛配卯故辛卯為八月大會也十一月陰陽二建俱會於子子近於壬以壬配子故壬子為十一月大會也十二月陽建於丑陰建於亥丑近於癸以癸配亥故癸亥為十二月大會也

陰陽大會立成

月會大會

大會所領日

春 夏 秋 冬

正月甲戌

癸卯 己丑 寅 卯 辰
巳 申 辛 壬 癸

歲位歲後歲對歲前

七月庚辰

戊寅 己卯
庚辰 辛巳

歲對歲前歲位歲後

二月乙酉

癸卯 甲辰
乙巳 丙午

歲位歲後歲對歲前

八月辛卯

己酉 庚戌
辛亥 壬子

歲對歲前歲位歲後

五月丙午

甲寅 乙卯
丙辰 丁巳
戊午 己未
庚申 辛酉
壬戌 癸亥

歲前歲位歲後歲對

十月壬子

壬子 癸丑
甲寅 乙卯

歲後歲對歲前歲位

六月丁巳

丁巳 戊午
己未 庚申

歲前歲位歲後歲對

十二月癸亥

癸亥 甲子
乙丑 丙寅

歲後歲對歲前歲位

右大會望後用之其所領日從本會日起逆數至上會止即得所領日數也

陰陽小會

堪輿經曰二月小會巳酉三月戊辰四月巳巳五月戊午八月巳卯九月戊戌十月巳亥十一月戊子○董仲舒曰戌亥近乾為天門辰巳近巽為地戶天老曰陽生於子不足於天門陰生於午不足於地戶卯酉厭建相對陰陽之關皆以中宮戊巳配其厭建以為

陰陽小會也○二月陽建於卯陰建於酉陰陽相衝以乙配酉以辛配卯大會皆有之故以巳配陰建之酉為陰陽小會也三月陽建於辰陰建於申以庚配辰大會有之以乙配申陰陽非耦故以戊配辰為三月小會也四月純陽用事陰勢盡消故無大會以巳為四月小會也五月陽建陰建俱會於午故以戊配所建之辰則戊午為五月小會也八月秋分建厭分位亦以巳配陰陽建厭之辰故八月以巳卯為

小會也九月剝卦直月陽消將盡故無大會而以戌
戌為小會也十月陽勢消盡純陰用事故無大會則
以己亥為十月小會也十一月陰陽二建俱會於子
亦以戌配所建之子故十一月戌子為小會也

陰陽小會立成

月會小會

小會所領日

春 夏 秋 冬

二月己酉

卑 庚 帝

歲位歲後歲對歲前

三月戊辰

癸 甲 丑 寅 帝

歲位歲後歲對歲前

四月己巳

戊辰

歲前歲位歲後歲對

五月戊午

己巳

歲前歲位歲後歲對

八月己卯

戊辰 庚辰 辛巳 壬午

歲對歲前歲位歲後

九月戊戌

辛巳 壬午 癸未 甲申 丁酉

歲對歲前歲位歲後

十月己亥

戊辰

歲後歲對歲前歲位

十一月戊子

己巳 庚辰 辛巳 壬午 丁亥

歲後歲對歲前歲位

又小會望前用之其所領日亦從本會日逆數至他
大小會止○曹震圭曰大會者是月內陰陽正會之

辰也小會者是陰陽偶會之辰也故為上吉之日比和之辰

按大會者陽會於陰也小會者陰會於陽也其月無大會者以其干支不能相配如三月辰中之乙不能配陰建之申四月巳中之丙不能配陰建之未是也小會為陰會陽故其日皆用陽建惟二月八月陰陽二建對衝故相易也其月無小會者以其日大會已有之或他月小會已有之觀其所領日逆至他月大

小會日則止可見矣

天子用日

堪輿經曰天子用歲位之日以陽建之方為之如春三月建寅卯辰即以正二三月大小會日為歲位也

皇后用日

太子諸侯同

皇后太子諸侯用歲前之日以王前之會為之如春木旺在東方則以冬月為歲前之會也

卿大夫用日

卿大夫用歲對之日以建王所衝為之如春三月建王
東方寅卯辰衝在西方申酉戌故春三月以秋為歲
對也

士庶用日

士庶用歲後之日以王後之會為之如春王東方以夏
為歲後之會也大小會並同

行狼

丁戾狐辰附

天寶歷曰過為行狼不及為丁戾不合為狐辰○堪輿

經曰三月陽建於辰陰建於申陽前不及於丙隔於
巳也後過於甲隔於卯也故以甲配申則不從以丙
配申不及以戊庚壬配申則不合故甲申為行狼丙
申為了戾戌申庚申壬申為孤辰也四月陽建於巳
陰建於未陽前不及於丁隔於午也後過於乙隔於
辰也故以乙配未則不從以丁配未則不及以巳辛
癸配未則不合故乙未為行狼丁未為了戾巳未辛
未癸未為孤辰也九月陽建於戌陰建於寅陽前不

及壬隔於亥也後過於庚隔於酉也故以庚配寅則
不從以壬配寅則不及以甲丙戊配寅則不合故庚
寅為行狼壬寅為了戾甲寅丙寅戊寅為孤辰也十
月陽建於亥陰建於丑陽前不及癸隔於子也後過
於辛隔於戌也故以辛配丑則不從以癸配丑則不
及以乙丁巳配丑則不合故辛丑為行狼癸丑為了
戾乙丑巳丑丁丑為孤辰也○曹震圭曰月建者陽
也月厭者陰也陽主干陰主支若得陽建前後近干

以配陰建者大會也若以陽建後隔位之干配陰建者為行狼不從乃陽氣不從也陽建前隔位之干配陰建者為了戾不及是陽氣不及也以陰建左右之干自配者為孤辰非其正應陰自配也故曰不合

單陰

自單陰至純陽四位皆以時無大會故以戊己配月建為之出堪輿經

三月卦得夬謂五陽爻對一陰爻故戊配辰為單陰也

純陰

十月卦得坤謂六爻皆陰陽氣已盡故以己配亥為純

陰也

孤陽

九月卦得剝謂五陰爻對一陽爻故以戌配戌為孤陽也

純陽

四月卦得乾謂六爻皆陽陰氣已盡故以巳配巳為純陽也

歲薄

四月陽建於巳而左行陰建於未而右行陰陽相向欲合於午故以丙午戊午為四月歲薄也

十月陽建於亥而左行陰建於丑而右行陰陽相向欲合於子故以壬子戊子為十月歲薄也○曹震圭曰薄者迫也陰陽二建交相迫之丙壬則近子午之壬戌者謂時無大會皆以戊巳配之也

逐陣

六月陽建於未而左行陰建於巳而右行陰陽相背分

別於午故以戊午丙午為六月逐陣

十二月陽建於丑而左行陰建於亥而右行陰陽相背分別於子故以壬子戊子為十二月逐陣○曹震圭曰陰陽二建此月相分背各隨其陣也

陰陽交破

四月陽建於巳破於亥陰建於未破於癸癸陽也為陰所破也亥陰也為陽所破也是謂陽破陰陰破陽故四月癸亥為陰陽交破

十月陽建於亥破於巳陰建於丑破於丁丁陽也為陰
所破也已陰也為陽所破也是為陽破陰陰破陽故
十月丁巳為陰陽交破

陰陽擊衝

五月陰陽俱至午陽建挾丙而擊壬陰建居午而衝子
故五月以壬子為陰陽擊衝

十一月陰陽俱至子陽建挾壬而擊丙陰建居子而衝
午故十一月以丙午為陰陽擊衝

陽破陰衝

六月陽建於未而破丑陰建於巳而衝癸故六月癸丑為陽破陰衝也

十二月陽建於丑而破未陰建於亥而衝丁故十二月丁未為陽破陰衝也

陰位

三月陽建於辰陰建於申故三月庚辰月宿在辰為陰位

九月陽建於戌陰建於寅故九月甲戌月宿在戌為陰位

陰道衝陽

二月陽建於卯而衝酉陰建於酉而衝卯故二月己卯月宿在卯為陰道衝陽

八月陽建於酉而衝卯陰建於卯而衝酉故八月以己酉月宿在酉為陰道衝陽

三陰

正月破在申一陰也厭在戌二陰也辛在其間三陰也
故正月得辛卯月宿在卯為三陰也

七月破在寅一陰也厭在辰二陰也乙在其間三陰也
故七月得乙酉月宿在酉為三陰也

陽錯

以陽建之支配當方之干陰陽自相配合為日以值所
衝之宿為陽錯如正月陽建在寅近於甲支干相配
為甲寅日寅衝於申故正月甲寅之日月宿在申為

陽錯二月陽建在卯近於乙支干相配為乙卯日卯
衝於酉故二月乙卯之日月宿在酉為陽錯三月陽
建在辰近於甲支干相配得甲辰日辰衝於戌故三
月甲辰之日月宿在戌為陽錯也餘倣此

陰錯

以陰建之支配當方之干陰陽自相配合為日以值所
衝之宿為陰錯如正月陰建於戌近於庚支干相配
為庚戌日戌衝辰故正月庚戌之日月宿在辰為陰

錯二月陰建於酉近於辛支干相配為辛酉日酉衝
卯故二月辛酉之日月宿在卯為陰錯三月陰建在
申近於庚支干相配為庚申日申衝寅故三月庚申
之日月宿在寅為陰錯餘倣此唯五月十一月陰陽
二建會於子午故無陰錯陽錯

陰陽俱錯

五月十一月陰陽二氣同建一辰則以所建之支配所
近之干共為一日月宿居月建所衝之辰為陰陽俱

錯如五月陰陽二建合於午近於丙配為丙午月宿
在子為陰陽俱錯十一月陰陽二建合於子近於壬
配為壬子月宿在午為陰陽俱錯也

絕陰

絕陰者謂三月四月陰氣絕也故三月小會所領日為
四月絕陰所領日

絕陽

絕陽者謂九月十月陽氣絕也故九月小會所領日為

孤陽

純陽

歲薄

逐陣

陰陽交破

陰陽擊衝

陽破陰衝

欽定四庫全書

御定皇極考原

卷五

三十二

巳

戊戌

正二三四五六七八九十十一十二

丙午
戊午

戊子
壬子

丙午
戊午

戊子
壬子

癸亥

丁巳

壬子

丙午

癸丑

丁未

陰位

陰道衝陽

三陰

陽錯

陰錯

陰陽俱錯

絕陰

絕陽

			庚戌	甲寅	辛卯		
			辛酉	乙卯		巳卯	
			庚申	甲辰			庚辰
	癸亥至 戊辰		丁未 己未	丁巳 己巳			
		丙午	己巳 丁巳	丁未 己未			
			甲辰	庚申	乙酉		
			乙卯	辛酉		巳酉	
			甲寅	庚戌			甲戌
戊戌	辛卯至		癸丑	癸亥			
		壬子					
			癸亥	癸丑			

曹震圭曰以上諸日雖遇天德月德玉堂生氣黃道
吉星值日亦不可用集正所謂陰陽不足之辰是也
忌興造嫁娶上官赴任入宅遷移出行交易合藥
問病百事不宜

按以上立成所載等日皆從陰陽二建起論於選
擇他書無所見姑附於此

御定星厯考原卷五

欽定四庫全書

御定星厯考原卷六

用事宜忌

選擇總論

吉凶之說昉於易衍於疇所以順性命之理盡變化之道而教人卜筮以為趨避之宜者也然陰陽既分剛柔定位五行順布則生尅無端干支相推則衝合互見以及納音納甲派衍而枝分八卦九宮同條而共貫皆推

原於易理根柢於圖書論日以繁術日以巧是不可謂
理之所必無而亦勢之所必至者也三代而後陰陽家
者流各出其說以鳴於世亦已紛矣況一日之間有吉
神又有凶神且有一神而異名者異其名矣又有一為
吉一為凶者夫神煞之名不過即五行之生旺休囚干
支之刑衝合會以為斷耳術數之徒乃甚言其吉凶以
駭衆而震俗偶有所驗羣鳥信之而古之立說茫乎莫
知其所由來矣今吉凶神煞既為註釋而又即用事註

其宜忌以為選擇之例亦皆仍歷書之舊云

上冊受封

歷例曰凡登壇受冊追封諡號等事宜月德合忌四廢
牢日獄日徒隸死別伏罪不舉罪刑建破平收閉日

○曹震圭曰正月宜辛未辛卯辛酉二月宜己丑己
亥己未三月宜丁亥丁酉丁巳四月宜乙丑乙酉乙
卯五月宜辛未辛丑辛亥六月宜己巳己卯己亥七
月宜丁卯丁丑丁酉八月宜乙丑乙未乙巳九月宜

辛巳辛卯辛亥十月宜巳卯巳酉巳未十一月宜丁
丑丁未丁巳十二月宜乙亥乙酉乙巳

肆赦

歷例曰凡赦過宥罪釋獄緩刑蠲除賦役起拔幽錮撫
納流亡復還遷黜等事宜天赦天德合○曹震圭曰
正月宜六壬日戊寅日二月宜戊寅日三月宜六丁
日戊寅日四月宜六丙日甲午日五月宜甲午日六
月宜六巳日甲午日七月宜六戊日八月宜戊申日

九月宜六辛日戊申日十月宜六庚日甲子日十一月宜甲子日十二月宜六乙日甲子日

覃恩

歷例曰凡晉遷官秩恤孤惇施恩惠宜陰德天恩天赦天德合○曹震圭曰正七月酉日二八月未日三九月巳日四十月卯日五十一月亥日

布政事

歷例曰凡頒布制令敷揚風化等事宜天恩天馬忌四

殺○曹震圭曰正七月午日二八月申日四十月子
日五十一月寅日

行賞

歷例曰凡給賜親戚賞賚勲德錫命藩屏等事宜天恩
忌四殺若遇時德者止注賞賀宴樂若遇滿日注施
恩行賞并忌閉日

招賢舉正直

歷例曰凡擇選寮案委用謀猷舉隱逸賢能宜天馬天

喜忌破平收日○曹震圭曰正月午日二月申日三月午日四月子日丑日五月丑日寅日六月無七月辰日午日八月辰日申日九月戌日十月子日未日十一月寅日未日十二月無

出師

歷例曰凡選將訓兵出師征討等事宜天德合月德合吉期兵吉兵福兵寶寶日義日制日天馬○要安止宜安撫邊境忌月虛大時大敗大殺劫殺死氣死神

天獄天火兵禁五墓往亡四廢四離四絕四窮四耗
四擊八專九醜月刑月害伐日專日及四殺日○曹
震圭曰正月宜辛未癸酉庚辰丁酉甲辰丙辰二月
宜乙丑丙寅丁丑辛丑壬寅辛亥庚寅己亥申日安
撫邊境三月宜甲子庚寅丙寅壬寅己亥庚子辛亥
卯日安撫邊境四月宜甲子甲戌庚子庚戌酉日安
撫邊境五月宜己巳辛未壬申庚辰癸巳乙未丙申
甲辰乙巳戊申丙辰辰日安撫邊境六月宜丙寅己

己庚寅癸巳壬寅乙巳七月宜乙丑丁卯甲戌丁丑
丙戌癸卯庚戌八月宜己巳辛未壬申癸巳乙未丙
申乙巳戊申亥日安撫邊境九月宜己巳壬申癸巳
甲午丙申戊申乙巳午日安撫邊境十月宜庚辰甲
午甲辰丙辰子日安撫邊境十一月宜乙丑丙寅乙
亥丁丑庚寅巳亥辛丑壬寅辛亥未日安撫邊境十
二月宜甲子壬申乙亥丙申巳亥庚子戊申辛亥

納表上章

歷例曰凡進納封章披陳利害伸理詞訟等事宜福德
月空聖心解神忌反支天獄官符天吏臨日癸日建
破平收滿閉日○曹震圭曰正月宜壬戌日忌子午
日壬午日酉日忌詞訟二月宜申日庚戌庚辰不宜
未酉二日午亥二日忌詞訟三月宜子日丙寅日不
宜申日卯日忌詞訟四月宜寅午戌三日不宜卯日
巳酉丑三日忌詞訟五月宜丑日壬寅壬辰日不宜
戌日酉日忌詞訟六月宜子日庚寅庚申日不宜亥

酉二日午日忌詞訟七月宜丙辰日不宜子午日卯
日忌詞訟八月宜寅日甲辰甲戌日不宜卯丑日子日
忌詞訟九月宜卯日壬午壬申日不宜寅日酉日忌
詞訟十月宜辰日庚子日不宜卯日午未日忌詞訟
十一月宜丙申丙戌日卯日忌詞訟十二月宜午日
甲寅甲申日不宜卯巳二日子日忌詞訟

祭祀

歷例曰凡時享禘祫告成郊丘封禪嶽鎮禮享祈禱等

事○天寶歷曰宜神在日忌天狗遊禍寅日時祭不拘

祭竈

禮曰孟夏祭竈又五祀之一曰竈○歷例曰凡炊爨烹飪鼓鑄陶冶祈祀等事宜孟夏月癸日黎庶但以六癸日記之忌天狗遊禍寅日建破平收日如遇神在不忌

祈福

歷例曰凡建立道場開設齋醮禳除災咎請求福願等
事宜天德合福生福德天巫忌天狗寅日建破平收
日○曹震圭曰正月宜酉日壬午壬戌壬子三月宜
丁卯丁亥丁酉丁巳四月宜辰日丙午丙子丙戌五
月宜亥日六月宜巳日己卯己亥七月宜子日戌辰
戌午九月宜辛巳辛卯辛亥辛酉十月宜未日庚午
庚辰庚子庚戌十二月宜申日乙亥乙酉乙巳二八
十一月無

修宮室

易曰上古穴居而野處後世聖人易之以宮室上棟下
宇以待風雨蓋取諸大壯○白虎通曰黃帝作宮室
以避寒溫○月令云孟秋之月可以修宮室當於七
月擇上吉日而用之如有增修但於吉月皆可擇用
修造動土豎柱上梁

歷書曰凡營建宮室修飾垣牆坡池臺榭園囿橋梁戶
牖欄檻等事宜天德枝德月德天德合月德合四相

生氣三合月恩玉宇金堂益後天寶天對天玉青龍
天府執儲成日定日忌四廢五墓天刑朱雀白虎元
武勾陳天牢建破平收日修造動土並忌土符土府
地囊土王用事後豎柱上梁並忌天火大殺○曹震
圭曰正月子辰未戌丙午上吉乙未不宜丑日中吉
丁卯辛卯次吉二月己亥丁亥戊寅未日上吉乙未
不宜寅亥中吉丙戌丙申己巳丁巳己丑丁丑次吉
三月子寅己申酉亥上吉庚申辛酉不宜甲子戊子

中吉丙午庚午壬午次吉四月丑未戌日上吉丙戌
不宜辰午中吉甲午上吉己卯乙卯辛卯乙酉辛酉
己酉次吉五月丑申戌寅上吉寅日中吉戊辰戌戌
己巳辛巳辛亥次吉六月卯巳申亥寅上吉癸亥不
宜甲子戌子己酉中吉辛酉丙子甲午次吉七月子
丑辰未戌壬午上吉辛丑癸亥不宜午日丁卯癸酉
次吉八月寅未日上吉甲寅不宜丑巳日次吉癸丑
癸巳亦上吉乙丑乙巳中吉九月寅申亥日上吉甲

寅不宜酉巳庚午壬午丙午中吉丙子庚子壬子辛
卯癸卯次吉十月丑辰未戌乙卯上吉午日中吉丙
午不宜乙酉亦上吉甲子巳酉巳卯次吉十一月申
上吉丑乙巳中吉甲戌甲辰甲寅巳巳辛巳癸巳次
吉十二月寅卯亥巳甲申庚辰庚申上吉丁巳不宜
申日中吉乙酉亦中吉庚午甲午辛酉次吉

修倉廩

總要歷曰宜用天倉日忌大耗九空○曹震圭曰月令

云仲秋之月命有司穿竇窖修囷倉謹蓋藏務出納
故宜於仲秋之月擇天恩日與營修上中吉日併者
用之或餘月內選用吉日亦可如增修則不必天倉
二月丁丑己丑日三月子日四孟月無五月戊戌六
月己酉八月乙丑丙寅辛巳辛亥癸丑九月庚午壬
午丙午十一月甲辰十二月卯日

繕城郭

管子曰內為城外為郭○白虎通曰天子崇城言崇高

也諸侯干城言不敢自專禦於天子也○歷例曰凡
始建宮闕築壘城郭并省臺寺監倉庫公府凡興土
工宜天德枝德生氣三合益後四相要安天寶天對
天符雷公執儲成日忌土府土符地囊五墓天火四
殺蚩尤飛流天棒土勃陰私天獄及土王用事後○
曹震圭曰宜用正月子戌未丙辰上吉乙未不宜
辰日中吉丁卯丁酉丙午次吉二月未日丙寅丙申
丁亥上吉寅日中吉申亥丁丑次吉三月寅申丁亥

丁巳上吉甲寅不宜亥巳中吉丁卯丙子壬子次吉
四月丑未戌戊午上吉丙戌巳丑不宜午中吉戌辰
巳卯辛卯巳酉辛酉次吉五月寅申中吉辰日戌戌
巳亥巳丑次吉戌辰凶六月卯巳申亥上吉癸巳不
宜甲寅中吉甲子戌子次吉七月子子丑辰癸未壬戌
上吉辛丑不宜壬午未戌中吉癸酉次吉八月寅日
癸巳上吉巳日中吉癸丑癸亥次吉九月寅午壬申
丙申癸酉癸巳上吉巳申酉壬午丙午中吉甲午戊

午庚午癸卯次吉十月未戌乙丑甲午上吉丑午中
吉甲子乙酉次吉十一月乙丑上吉丑日乙巳中吉
甲戌甲辰次吉十二月亥巳甲寅庚寅甲申庚申乙
卯上吉寅卯申中吉甲午庚午乙酉次吉忌用正月
丑寅日庚子庚午日二月卯巳日癸未癸丑日三月
辰酉日甲寅甲子日四月寅巳日巳卯巳丑日五月
午日戌辰日六月戌未日癸巳日七月卯申日丙寅
日八月未酉日丁卯丁巳日九月戌亥日戌辰戌子

日十月辰亥日庚戌庚子日十一月申子日辛未辛酉日十二月子丑日乙未乙酉日

爐冶

歷例曰凡置爐冶與修造動土同若鎔鑄器物忌九焦開渠

歷例曰凡穿浚溝渠池沼泉源等事宜生氣開日開渠忌壬日并忌土符土府地囊閉日建破平收日土王用事後○曹震圭曰通溝于三月中氣後擇上吉日

用

穿井

歷例曰宜用生氣日開日忌土符土府地囊閉日建破
平收日及土王用事後并忌卯日

修碓磴

天寶歷曰春不修碓磴謂陽初也夏不修碓磴謂陽衰而陰
微也各月擇吉日用之宜定日成日開日忌土符土
府地囊五墓建破平收日土王用事後

拜官

歷例曰凡襲封官爵等事同宜時德天喜驛馬王日官
日相日民日守日建日忌官符徒隸死別伏罪不舉
罪刑四廢牢日獄日破日平日收日滿日閉日○曹
震圭曰宜正月卯酉寅日二月卯日三月寅酉巳日
四月子巳午日五月午日六月巳申子日七月申酉
卯日八月酉日九月申亥卯日十月子午亥日十一
月子日十二月亥寅午日忌正月子丑辰未戌亥日

二月子丑辰未申戌亥日三月子丑未申戌亥日四月寅卯辰未戌日五月卯辰未戌亥日六月寅卯辰戌亥日七月丑巳午未戌日八月丑寅巳午未戌日九月丑寅巳午未戌日十月丑辰酉申戌日十一月丑辰巳申酉戌日十二月辰巳申酉戌日又凡速用不能待吉日者於忌日之外選而用之

上官赴任

歷例曰凡奉承恩命臨赴治任等事同宜驛馬月德月

恩王日官日相日民日守日忌天獄天吏往亡四絕
四離建破平收滿閉日○曹震圭曰宜正月卯午日
丙戌丙午日二月甲戌丁丑甲申丁亥甲辰丁未三
月寅酉日庚子壬子日四月庚午己卯己丑庚戌五
月丙寅戌辰戌寅丙戌戌戌六月子申日辛亥甲寅
日七月子日壬午壬辰日八月庚辰癸未庚寅庚戌
癸丑九月申亥卯日丙寅庚午庚寅丙申丙午庚申
日十月子日乙酉甲辰十一月壬申甲申壬辰甲辰

十二月寅午亥日庚申日忌正月子日三月申日四月亥日六月卯日七月午日九月辰日子酉日十月未日十一月戌日十二月丑酉日二五八月無

臨政親民

歷例曰凡禮上叅賀頒布條令受覽圖籍聽決獄訟等事宜王日官日相日民日守日臨官視事宜六儀忌蚩尤飛流天棒陰私土勃天獄天吏臨日官符建破平收滿閉日牢日獄日徒隸死別伏罪不舉罪刑

破屋壞垣

歷例曰凡毀拆屋舍平覆垣墉等事宜破日忌成日

平治道塗

凡平理地勢道路途徑等事宜平日

補垣塞穴

凡填覆坑窋補葺垣墉基址宜滿閉日忌九坎開日

伐木

歷例曰凡採取材木等事宜立冬後立春前午日申日

危日忌建破平收日○曹震圭曰月令云孟夏之月
毋伐樹木草木零落然後斤斧入山故立冬後立春
前擇午申日用之

按午火也申金也金能剋木木受其傷木能生火木
洩其氣故以用之

移徙

歷例曰凡移徙居處等事宜驛馬月恩四相忌歸忌九
醜建破平收日月厭日

掃舍宇

凡掃除宮室宅舍等事宜季月除日忌日遊神所在之方

安牀

安置產室附

歷例曰凡安置產室豎立幃帳張懸帷幄等事宜危日忌申日及日遊神所在之方○安置產室宜益後月德忌死氣遊神

經絡

歷例曰凡經緯紡績絲麻織造布帛等事宜滿日忌庚日

裁衣

歷例曰凡製造冠帶衣裳等事宜滿日成定開日王日并重復日忌長星短星建破平收日○曹震圭曰宜正月甲子庚午甲戌庚辰甲午庚子甲辰庚戌二月乙丑己巳辛未乙亥辛巳丁亥癸巳乙未己亥辛丑乙巳辛亥丁巳癸亥三月戊寅戊子戊申戊午四月

丙午丙戌丙辰王日也本無吉日以王日代之五月
丁丑丁亥丁巳丁未本無吉日以王日代之六月己
巳乙亥己卯辛巳丁亥癸巳己亥乙巳己酉辛亥丁
巳癸亥七月甲子庚午甲戌庚辰甲午庚子甲辰庚
戌八月乙丑己巳辛未乙亥辛巳丁亥癸巳乙未己
亥辛丑乙巳辛亥丁巳癸亥九月戊寅戊子戊申戊
午十月壬午壬辰壬子壬戌本無吉日以王日代之
十一月癸未癸巳癸丑本無吉日以王日代之十二

月己巳乙亥辛巳丁亥癸巳巳亥乙巳巳酉辛亥○
又大明歷四月十月全無裁衣吉日今以重複王日
代之

冠帶

歷例曰凡冠帶加服等事宜孟仲月定日忌丑日○曹
震圭曰內則云男子二十而冠女子十五而笄冠帶
之事成人之禮也今歷書用定日取安定之意無以
妄動也以成開為上吉日謂成者萬物有所成就也

開者生氣之辰無不通達也故為上吉日

入學

歷例曰凡尊師傅經等事宜孟仲月成開日

納采問名

歷例曰凡婚姻之禮納采問名納吉納徵請期等事宜
天喜成日定日忌八龍七鳥九虎六蛇建破平收日

結婚姻

歷例曰凡結會親姻燕集賓友婚禮等事宜吉期陽德

敬安天願時陽三合五合六合六儀續世不將執儲
玉宇天寶天對天府天玉忌五離八龍七鳥九虎六
蛇四耗大時小時上朔月害月刑劫殺建破平收滿
閉日○曹震圭曰正月宜子午未戌日不宜甲子壬
子日二月宜丑未亥日不宜戌日乙亥日三月宜亥
寅子日不宜乙亥甲子日四月宜丑卯戌日甲子戌
子日不宜乙卯日五月宜寅未戌日不宜辰日六月
宜寅亥卯巳日不宜丁亥乙卯日七月宜子丑午辰

卯日不宜戊午庚子日八月宜丑辰未巳日九月宜
寅巳午日不宜戊午日十月宜卯辰午未日十一月
宜丑戌辰三日十二月宜亥巳日不宜癸亥日

張設宴樂

紀歲歷曰凡張設宴樂集會賓朋不在結親一例或有
不值結親亦可用者宜金堂時陽忌與結親同○曹
震圭曰正月宜辰子日不宜甲子日二月宜丑日三
月宜寅日四月宜卯亥日五月宜辰日六月宜巳日

七月宜午日八月宜丑未日九月宜申日十月宜寅
日十一月宜戌日十二月宜亥卯日○右若遇結親
吉日者亦可用不忌四殺滿閉日

嫁娶

歷例曰凡出嫁迎娶等事宜不將日周堂值第堂廚竈
日如遇翁姑而無翁姑者亦可用之忌亥日月厭厭
對無翹歸忌往亡氣往亡八龍七鳥九虎六蛇周堂
值夫婦日并忌日月蝕日

求嗣

厯例曰凡祈禱子息等事宜續世并神在忌天狗日建

破平收日

出行

遠回乘船登高附

厯例曰凡巡狩省方遠遊謀運經營轉輸宜四相天馬
驛馬建日開日忌往亡四絕四離月厭天賊巳日破
日平日收日凡遠回忌歸忌月厭乘船渡水忌九坎
招搖咸池八風觸水龍登高履險忌危日○曹震圭

曰正月宜午子日二月卯丑申日三月辰寅日四月
子卯日五月寅午辰申日六月未日七月午日八月
酉未申亥日九月戌申日十月亥酉子日十一月子
寅日十二月亥日○往亡四離四絕須憑本年歷日
所定

遠行

紀歲歷云凡遠旅求謀出入興販等事宜月恩日取索
宜收日忌大耗小耗天賊四擊日出入興販忌劫殺

宜出行上吉日

漁獵

捕捉附

歷例曰凡狩獵取魚擒捕盜賊等事同宜收日執日雨水後立夏前收日執日危日註捕捉取魚霜降後立春前註捕捉畋獵遇天恩天赦日不可漁獵止宜捕捉○曹震圭曰獺祭魚然後虞人入澤梁豺祭獸然後畋獵故雨水後立夏前註捕魚霜降後立春前註畋獵也

牧養

納畜附

歷例曰凡孳育禽魚豢養獸類等事宜六儀毋倉天倉生氣四相忌月害月殺月刑建破平收日納畜宜定日忌與前同又戌日忌納天

種蒔栽植

歷例曰凡種植百穀及栽接花果等事宜毋倉四相生氣忌九焦地火月殺建破日栽植又宜六儀又忌死神死氣乙日

開市

歷例曰凡開張店坊等事宜五富陽德滿日成日開日
忌長星短星四窮四廢九空小耗建破平收閉日

交易

歷例曰凡立契券交貿易等事宜陽德三合五合六合
定日忌長星短星小耗五離建破平收日凡立券忌
己日受田忌戊日

醞釀

歷例曰凡釀酒醴和醢醢等事宜成日定日忌辛日破日

納財

歷例曰凡受田宅納貨財等事宜月恩天倉天願成日
滿日收斂貨財宜收日忌九空大殺四廢四窮長星
短星建日破日平日凡出貨財忌大耗小耗四耗五
虛月虛除日

進人口

宜收日滿日黃道日執儲天寶天對天王青龍天府忌
月害五離四窮四離建日除日破日平日

開倉庫

凡開倉庫出貨財宜陽德天恩天赦五富滿日四時天
德忌大耗小耗五虛月虛四耗四窮九空小時甲日

解除

歷例曰凡解安宅舍被除災青等事宜解神除神除日
晦日并宜申酉日忌建破平收日若建日與要安併

者可解安宅舍

療病

歷例曰凡針灸服藥求醫等事宜天醫天后天巫普護
除日破日開日忌死神死氣致死遊禍月害建日平
日收日滿日及晦朔弦望日減日沒日針灸忌血支
血忌及人神所在療目忌閉日服藥忌未日問卜忌
子日○曹震圭曰死神忌求醫療病死氣忌避病求
醫遊禍致死忌服藥往亡忌求醫未日忌服湯藥血

支血忌止不宜針刺

沐浴

歷例曰凡沐浴宜申酉亥子日忌伏社建破平收日凡洗頭每月宜用初三日初四日初八日初十日十一日十三日十四日十五日二十二日二十三日二十六日二十七日

剃頭

天寶歷曰剃頭宜正二月亥日四五月酉日七八月巳

日十月十一月卯日四季月午日用之忌丁日建日
每月十五日人神在頭日

整手足甲

歷例曰除手足甲宜丑日寅日六月六日晦日每月初六
日十六日忌建破平收日


破土

歷例曰凡破地開穴發故啓攢權厝殯殮等事宜鳴吠
對日忌密日重日復日土符地囊建破平收日并太

歲同支干日土王用事後

安葬

歷例曰安葬建塋權厝遷葬破土斬草等事宜鳴吠日
忌密日重日復日建破平收日開日



御定星歷考原卷六